

Vunzngoemx ndaej bi ndeu seiz riengz lwgnyez wnq doxdoengz, rox gwn, rox ndoet, rox daej, rox ninz.

Vunzngoemx ndaej song bi seiz, conghhoz de cij rox gangj “a a a”, hoeng gyoengq doengzdaih gaenq rox gangj gij vahgawq genjdanh lo. Daxboh vunzngoemx ngeiz naeuz: “Boux lwgnyez neix dwg mbouj dwg feiq lo? Vihmaz dan rox gangj ‘a a a’ ne?” Daxmeh vunzngoemx naeuz: “Mbouj miz maz saeh, lwgnyez rox gangj ceiz di, majhung le couh ndei lo.”

Doeklaeng daxboh vunzngoemx saedcaih raen mbouj deng, couh caeuq daxmeh vunzngoemx daiq vunzngoemx bae yihyen. Gij ngoemx vunzngoemx dwg mbwnbaenz. Canghyw naeuz seizneix mbouj miz banhfap yw cungj bingh youh ngoemx youh nuk neix. Bohmeh vunzngoemx got gyaeuj daej-nganga. Vunzngoemx dan rox riu, da de lumj manz dwk naeuz: “Nuk lo, ngoemx lo, youh baenzlawz ha?”

Baez yaep da vunzngoemx ndaej 7 bi lo, gyoengq lwgnyez ndaw mbanj cungj aemq daehsaw angqvauvau dwk bae hagdangz, vunzngoemx cijndaej youq ndaw gyanghongh gag baenj duzmoed. Bohmeh vunzngoemx hix siengj hawj vunzngoemx bae hag-dangz, hoeng lauxsae hagdangz doiq bohmev vunzngoemx naeuz: “Dangh-naeuz vunzngoemx daeuj itdingh hawj gij faenbingzyaenz doekdaemq, sou lij dwg bae ra hagdangz wnq ba!” Daxmeh vunzngoemx mbouj gangj maz lo, gij vah lauxsae de rox, hoeng ndaw ranz mbouj miz baenzlai ngaenz soengq vunzngoemx bae cungj hag-dangz boux lauxsae neix gangj.

Gyangngoenz vunzngoemx youq ndaw gyanghongh guhcaemz, mizseiz baenj duznon iq, mizseiz gag guh angq, mizseiz deng vunz sajriu. Raen lwgnyez ranz wnq cungj bae hagdangz ndaej son, hoeng lwgnyez swheij cij ndaej youq ndaw gyanghongh guh-caemz, daxmeh vunzngoemx moix baez siengj daengz gizneix couh guhcaeg lae raemxda, doq lae raemxda doq



gvaiq swheij, dwg de daiq boux lwgnyez mbouj miz maz coih ndeu daeuj aen seiqgyaiq neix lo. Daxboh vunzngoemx cijgoq ngaemgyaeuj ndoet laeuj, ndoet fiz le gaem vanj dawk gveng youq gwnz dieg.

Caj vunzngoemx maj daengz rox najmong seiz, youq ndaw gyanghongh gaenq mbouj raen ngaenz de lo. De baenzngoenz ngaenz youq ndaw rug iq swheij, ndaw rug baij rim gij vaih daj ndaw doi nyapnyaj gip ma, miz vanzgi giceh, feihgih, lunzconz, lij miz sienqdoengz, sienqdiet, suliu daengj-daengj. “Mwngz baenj gij nyapnyaj neix ndaej gwn lwi? Ndaej ndoet lwi? Vaiq di bae guh hong!” Daxboh vunzngoemx ciengzseiz dik bakdou sing hung dwk swenj, hoeng vunzngoemx dingq mbouj ndaej nyi, hix mbouj rox han. Daxboh vunzngoemx aeu cien haenqrengz “dung dung dung” dwk roq fajciengz, vunzngoemx roxnyinh saenqdoengh le, cij hai dou, ciep dwk couh deng daxboh de hoenx gaemxgienz ndeu, song da yap ronghrib. Daxboh vunzngoemx guh aen dungcoz vat namh, vunzngoemx ngaekngaek gyaeuj, gwed faggvak riengz daxmeh bae ndaw naz guh hong lo. Daxboh vunzngoemx daej dwk danqheiq gangj: “Caj dou dai le, bouxlawz daeuj ciengx mwngz ha?”

Miz baez ndeu, mbouj rox vunzngoemx gauj maz, laebdaeb song

ngoenz song hwnz suk youq ndaw rug youh iq youh ndat, mboujlwnh baenz-lawz roq ciengz, de cungj mbouj hai dou. Daxmeh vunzngoemx cam Daxboh vunzngoemx: “Daxboh vunzngoemx, dwg mbouj dwg daengngoemx daj baihrog gip ndaej bingznungzyoz ma ndoet lo?” Daxboh vunzngoemx naeuz: “W, danghnaeuz dwg yiengh-neix, couh mbouj yungh feiq sim lo!” Daxboh vunzngoemx hix cijdwg gangj riu, de rox daeglgw maz saeh cungj mbouj miz, aenvih gyangngoenz dingqnyi miz gij singyaem roq dox-gaiq, gyanghaemh youh dingqnyi sing ndaep daeng. Daxboh vunzngoemx sim ngeix: Hawj vunzngoemx gag guh-caemz ba!

Vunzngoemx dauqdaeij okdaeuj lo, de daenj aen mauhnyangj daj ndaw rug byaij okdaeuj. “Mwngz fatbag ha, youq ndaw ranz daenj mauh guhmaz ha?” Daxboh vunzngoemx gaem sauq-baet couh hoenx vunzngoemx. Daxmeh vunzngoemx ciengj sauqbaet gvaq-daeuj, swenj naeuz: “Ndaej lo! Mwngz hoenx de guhmaz? Hoenx sieng le baenzlawz banh?”

Gwnz naj vunzngoemx riu-nyumnyum dwk, de angq yaengx fwngz, vix gij henz mauhnyangj, lij “a a a” dwk heuh. Yenzlaiz gij henz mauhnyangj baihlaj miz aen beizden iq ndeu. Sijsaeq baez yawj, gij suliu daj nyapnyaj gip ma deng raed baenz

sam mbaw mbawbeiz, mbawbeiz dauq youq aen dendunggih iq daj vanzgi dendung giceh cek okdaeuj, song diuz densen lienz haerj giz ndaw mauh cuengq miz song hot denciz. Vunzngoemx naenx haigven, mbawbeiz couh baenq hwnjdaeuj, gij rumz ci diuz cag mauhnyangj biufefe.

Vunzngoemx duet aen mauh neix roengz, daenj youq gwnz gyaeuj daxmeh, daxmeh vunzngoemx lumj ndaej gwn dangzrwi nei, ndawsim diemzsis. Daxmeh vunzngoemx lumh aen beizden iq cang youq mauhnyangj angq naeuz: “Aen uk daeglgw gou caen cinglingz ha!” Daxboh vunzngoemx ngeiz naeuz: “Hw, gangj mbouj dingh beizden iq neix dwg daj gizlawz gip ma caiq cang youq ndaw mauhnyangj ne! Gou couh mbouj saenq de miz cungj bonjsaeh neix!” Daxmeh vunzngoemx fwt naeuz: “Ndaek vunz mwngz, baenzlawz yienghneix gangj daeglgw ha?” Vunzngoemx gojnaengz dingq rox bohmev de gangj maz, baenqndang haerj rug, bohmev de lau de youh haep dou, muengz riengz haerjbae. Vunzngoemx youh gaem aen mauhnyangj miz beizden okdaeuj hawj boh de yawj. Bohmev vunzngoemx raen ndaw rug daeglgw luenhlablab, maz cungj vut youq gwnz namh, hongdawz caeuq gij nyapnyaj vunzngoemx gip dauq gyaux youq itheij, geij aen vanzgi dendung giceh deng cek. Daxboh vunzngoemx gvaengzda dumz lo, aen sim gyoetcaep de sikhaek yungz bae, raeurub hwnjdaeuj.

Daxboh vunzngoemx haenh naeuz: “Daeglgw dou caen coengmingz! Bang de ra boux saefouh hag gij dinfwngz goj doeklaeng de ndaej ciengx swheij!” Daxmeh vunzngoemx ngaek-gyaeuj doengzeiq.

Gvaq geij bi, vunzngoemx youq gwnz gai hai aen diemq cienmonz coih gyahden. Haicieng ngoenzhaenx cuengq bauqreng haurjai nanz, bohmev vunzngoemx bungj aen ndoengj cang miz haurjai dangz, bouxlawz byaij gvaq cungj faen hawj, angqvauvau dwk riu, lumj gvaq ndwencieng nei.

Mboqgungq

虾 泉

□ Hasij

Youq Bingzgoj Yen Gojva Cin Gojva Cunh Mbanjswhngan henz Dahyougyangh miz aen Mboqgungq ndeu, liz Bingzgoj yienhsingz miz 28 goengleix.

Gij raemx Mboqgungq daj aen gamj henz Dahyougyangh dengj ok, lae roengz Dahyougyangh bae, gij raemxmboq neix seizdoeng raeuj, seizhah liengz. Mbouj rox dwg vihmaz, moix haemh haerj laep seiz, baenz-bang duzgunq couh daj ndaw dah doxcomz daengz giz raemxmboq caeuq raemxdah doxgap, yienzhaeuh ciengj gonq lau laeng dwk benz hwnj song mbiengj datrin.

Gyoengqvunz couh youq gij roen gungq youz daeuj cang rauz, hawj gij gungq neix gag daeq haerj rauz bae. Baez noix ne, hix ndaej geij gaen, baez

lai ne, haemh cang ndaej baenz bak gaen. Daegbied dwg haemh raemxdah hoemz caemhcai laepndwen, engq dwg seiz cang gungq demsou. Baenz-baenz it bi seiq geiq, haemhhaemh cungj cang ndaej gungq.

Danghnaeuz aeu dendungz rongh gij gungq, cijraen lwgda gij gungq ndongqndikndik, couh lumj ndaundeiq gwnz mbwn nei ronghsaksak. Geizheih dwg danghnaeuz aeu dendungz rongh nanz, gij gungq gawqyienz rox baenqgyaeuj benz roengz datrin youz dauq ndaw dah bae.

Gij gungq neix ga dinj noh biz, mboujlwnh cien roxnaeuz ceuj cungj heiq hom bak sangj, beij gij gungq gizwnq ndei gwn. Aenvih gij gungq mizmingz neix, ndigah vunz heuh aen mboq neix guh “Mboqgungq”.



Raemxdah heux gyoengq bya heu.